



17. Juni 20226

UPA 2025/130

Pujortartarneq nunatsinni peqqissutsimut annertuumik sunniutipiloqartaqisoq qanoq annikillisarnerusinnaanera pillugu apeqquteqaat aallaavingalugu siunnersuut

(Inatsisartunut ilaasortaq Aqqalu C. Jerimiassen, Atassut)

Siumumiit inatsisartunut ilaasortaq Aqqalu C Jerimiassen Atassut pujortartarnerup annikillisarsinnaanera siunertaralugu oqaallittoqarnissaanik siunnersuuteqarneranut qujaffigaarput.

Siumumi qularutiginnilarput pujortartarneq nunatsinni peqqissutsimut tunngatillugu unammilligassat annerit ilagigaat. Pujortartarneq inunnut ataasiakkaanut, ilaqutariinnut aammalu inuiaqatigiinnut tamanut annertuumik sunniuteqartarpoq. Nappaateqalernissamut aarlerinaat pujortartarnerup annertusitittarpaa, inuuniarnerup pitsaassusaa apparsarsinnaavaa peqqissarneqartariaqalernermillu assigiinngittutigut sunniuteqartumik pisinnaalertarluni.

Taamaattumik pissusissamisorpoq ingerlaavartumik nalilersortuassagipput ullumikkut qaammarsaanermut suliniutigineqartut naammannersut, imaluunniit nutaanik iliuuseqarnissat pisariaqartinneqarnersut.

Allanguinerit assigiinngitsut pisarnikuupput, Siumumiit isumaqarpugut piffissanngortoq anguniakkami ersarissumik siunniussaqaqartariaqalersugut. Meeqqat inuusuttullu ikinnerusut pujortartalernissaat angusariaqarparput, aammalu inersimasut amerlanerusut unititsiniarlutik siunniussaqaqartut periarfissaat annertusartariaqarparput.

Peqatigisaanillu nassuerutigisariaqarparput pujortartarneq inerteqquteqarnerinnakkut imaluunniit akitsuusersuinerannakkut taamaallaat akiorneqarsinnaanngimmat. Anguniakkamik ataavartumik angusaqarusukkutta, pinaveersaartitsinermik, paasissutissiinermik aammalu pujortarunnaarnissamut siunertamut tapersiisumut ataatsimut suliniuteqartariaqarpugut.

Pinaveersaartitsineq siusissukkut aallartittariaqarpoq. Meeqqat inuusuttullu pujortartarnerup kingunerisai pillugit ersarissumik qaammarsaatigineqartariaqarput, atuarfimmi, angerlarsimaffimmi aammalu inuiaqatigiinni tamani.

Assortunngilarput tupanik nioqquteqarnerup tingoriaannaanerat ersiinnaneralu atuinerit sunniuteqarsinnaanerat. Taamaattumik naleqquttuutipparput nuna allani misilittakkat ilanngullugit oqallisigisinnaanerat, ilanngullugit tupanik nioqqutissat takuneqarsinnaasumik pilerisaarutigineqarnissaannik saqqumisinneqarnissaannuullu killilersuinerit.

Peqatigisaanillu pingaaruteqarpoq suliniutit nutaat ajunngittumik sunniuteqarnersut uppernarsarneqarsinnaasunik ilisimasanik tunngaveqarnissaat.



Siumumiit aamma kissaatigaarput pujortarunnaarnissamut annertunerusumik ukkatarinnittoqassasoq. Pujortartartut amerlasuut unititsierusuttarput, kisianni aamma ajornakusoortittarlungu. Taamaattumik qulakkeertariaqarparput siunnersuineramik, ilitersuineramik aammalu tapersiineramik pitsaasumik orniginartumillu pujortarunnaarusuttunut neqerooruteqartoqarnissaa.

Siumumiit una oqallineq pujortartartunut ajorinninniaannarnermut tunngasutut isiginngilarput. Pineqartorli tassaavoq peqqinnarnerusumik inuuneqarnissamut periarfissamik pilersitsiniarluni oqallineq.

Siumumiit taamatut oqaaseqarluta oqallisissiamut qujavugut neriutigalulu oqallineq iluaqutaasussamik siunertaqarluni ingerlanneqassasoq.

Jess Svane SIUMUT